


+



2

海國圖志目錄

東阿未利加洲各國目錄

含摩那司國

英漢門國

蘇華臘國

馬尼加國

莫加蘭野國

莫新彌菴國

山維麻國

阿夏國

海國圖志卷二十一

歐羅巴人原撰

侯官林則徐譯

邵陽魏源重輯

小西洋

東北南三利未
亞共爲此卷

東阿利未加洲

東阿利未加洲濱臨因里阿海東自海岸以至西域寬約五六百里不等南自含摩那司北至阿夏海岸環繞計長三千里北廣南狹內有路巴達大山其橫縱起伏長竟海岸河二路非尼河由摩新彌葵出海匱彌西河

下流分四口出海商舶以歸爾厘麻尼河口為最土番
面黑頗工技藝千五百年

明宏治十三年

間葡萄亞人由兀賀

峽至此地墾闢南隅海岸拒絕外人故其中部落若干
會長若干甲所轄何地乙所轄何地幅員戶口政事教
門均未能悉南有含摩那司英漢門疏華臘麻尼加摩
加蘭牙摩新彌葵六部俱葡萄亞所轄北有山危麻摩
匱二部阿丹所轄
含摩那司東界海西界曠野南界加富臘厘阿北界英
漢門東阿未里加洲之南界即由此而起

英漢門東界海北界蘇華臘西南俱界含摩那司地卑
濕水土惡土番三千獠好鬥有葡萄亞炮臺守兵百五
十產顏料象牙黃臘象牙歲值十萬棒又船載人口售
于摩新彌葵輒十餘舟每舟四五百口

蘇華臘東界海西界麻尼加南界英漢門北界摩嘉蘭
野濱臨海岸灘沙日漲非小艇不能登岸土番是加付
臘黎阿種類常懷利刃不受約束葡萄亞初至本一大
市鎮也造築炮臺以禦土番地產金及象牙皆由染彌
西河運至交易今則改運莫新彌蕪所屬之歸爾厘馬

尼河口昔日市埠倏變窮鄉海舶間至亦止棉花粗貨

麻尼加東界蘇華臘西界曠野南界含摩那司北界摩

加蘭野葡萄亞人於千五百六十九年明隆慶三年率師奪

據築炮臺開埠市採金礦金雜山石中取之竭力而產

不旺惟銅鐵象牙與販賣人口交易甚大

麻加蘭野東界海西界曠野南界蘇華臘北界摩新彌

葵土番面光黑厚唇鬚髮兵惟弓矢無火器聞其地前

即摩諾摩達巴國新摩其首部落也後因割裂各霸一

方其曾占牙麥臘者即麻騰威湖之盜據新摩部落自

稱曰歸底威

莫新彌夔東界海西界曠野南界摩加蘭野北界山維

臘葡萄亞所轄地此為最大近海岸六島并屬葡萄亞

摩新彌蕘部落在歸爾厘麻尼河口之上道路雖坦水

土頗惡然葛葛衙署也之華麗甲於阿未里加洲所設稅口

公所墉垣宏敞近有坍塌貴人僣從服飾都麗佩帶多

飾以金居此者葡萄亞人五百阿丹人八百土番約六

千黑番千有五百炮臺不甚堅可禦海賊難拒大敵歸

爾厘麻尼為國中中市鎮赤金象牙販賣人口均由匭

彌河運至市埠鱗次近因英吉利奪得達温峽與毛厘底敖司二處阻販人口過境故市減大半然每年運回葡萄亞者尚不下四千口厥凌島在其對岸舊無人居葡萄亞人開闢其地遷莫新彌夔之人居之與馬那亞司加大島相近常被其劫奪歸阿臘島亦葡萄亞市埠孟麻沙島膏腴產糖與五穀般麻島匱西脈島孟菲阿島陸產固豐其海中尤多珊瑚以上皆葡萄亞所轄其貿易以匱西墨島為最有炮臺設兵二百三十幾利斯底匱人五百番奴二萬一千八百有奇土番約萬人產

密糖黃臘顏料

以上六國皆屬葡萄亞

山維麻東抵海西抵曠野北界阿匱南界莫新彌夔葡萄亞始至其地向是蘇恢里西人所據今則分而為三南隅腹地為臘爾臘人所奪牙爾臘者阿邁司尼阿國中土蠻也南隅沿海諸岸則為阿丹所奪北隅有麻雅諾沙大部落據之拒絕歐羅巴不通往來千七百七年康熙四十七年有英吉利之船戶駕三板船登岸探訪被羈不返由洋面遙望麻雅諾沙部落半屬茅舍半屬高大石墳工作華麗故歐羅巴人謂之埋人城墨臍瓦者麻雅

諾沙之部落貿易鱗萃亦一大市鎮也

阿匿東西抵海南界山維麻西北界阿邁司尼西南抵曠野為東阿未里加盡處北岸對海即阿丹地阿匿土番種類甚雜地盡沙石土燥不宜播種北多山阜所運出土產除香料外莫識何物麻馬臘亦一小部落每年一會所產香膠沒藥乳香赤金象牙諸貨畢至商賈雲集阿丹所貿易之香膠香料大半由此購去并聞內地運出者距麻馬臘二十日程殆產自牙爾臘地也阿匿爾在阿匿西北與牙爾臘毘連首部曰西臚本阿匿舊

地俗奉馬哈墨教常與阿邁司尼阿爭鬥日久兩憊各自分理西臘貿易蕃庶竟為阿邁司尼所奪由此再進則皆山野內有任尼羅國遇新酋立時即屠其舊酋媵妾大官取血以飾宮室

以上二國皆屬阿丹

北阿利未加洲四國

即職方外紀之馬羅可國弗沙國也古分二國今分四國

為佛蘭

西藩屬

阿利未加洲之北四國曰摩羅果曰阿爾尼阿曰都尼
司曰特厘波里四國同區統而名之曰麻馬里南依大
山北濱地中海地狹而袤長東界伊揖西界阿蘭底海
計長二千里南抵阿臘特斯山北抵地中海計寬自五
六十里以至百餘里阿臘特斯山自東自西長與麻馬
里等最高之峯千有三百丈其餘小峯四五百丈均在
麻馬里之境山林深密終年積雪四國土番皆麻密種

類容貌風俗四國皆同當國勢盛時文教與額力西相等武功與意大里爭雄兼取得大呂宋之西棲島商埠雲集既強且富名著海邦何期盛衰靡常四國均為意大里亞所滅既又為回教之阿丹侵奪設立加里甫統轄之駐兵加爾灣悉令改從回教之馬哈墨教燬其書籍愚其耳目並隔絕他國不許往來垂二百餘年聲教掃地竟成野蠻頑蠢幾不可問後值阿丹衰弱各國始自為主既而阿彌尼阿都尼司特黎波里三國旋為都魯機所滅分設總理之官在阿爾尼阿者曰尼在都尼

司者曰彌在黎波里者曰巴札遂均為都魯機屬國屯兵鎮守是時土人分三種曰摩羅即都魯機之人曰阿丹即回教之人曰土番即山谷土著舊人摩羅踞城邑

嗜鴉片

採取本地所產蘇依法配製亦曰鴉片

阿丹之人則游牧遷徙以

羶帳為廬舍其本地土番多在阿特臘斯山巖居穴處銃獵為生然都魯機之兵皆無賴橫行動輒戕官盜劫四出居民咸罹荼毒惟摩羅果一部未被侵奪謹守疆域其王亦勤政自強都尼司特黎波里二國近亦復國自王惟阿爾尼阿染都魯機之俗專掠歐羅巴各國商

船惟被彌利堅英吉利二國之船所敗既又劫佛蘭西商船佛蘭西遂起兵擣其巢穴設兵分守然其人皆賊很難與耦居故佛蘭西之兵近亦退居海口

摩羅果國爲麻馬里極西之地在阿特臘斯大山之後幅員二十九萬方里人戶千二百萬口土沃產豐惟達非里部落較瘠其國舊通聲教後王無道遂爲阿丹所奪王旣降爲部酋愈恣昏亂所屬兵亦如禽獸垂二百餘年遂成野人近日復國仍以摩羅果爲國都新王力革汚俗政事文學日漸起色惟所行律法仍用回教且未設議事之官臨事倉猝裁決並無舊章骨肉時思篡奪故叛謀迭見護衛兵五千與操防之兵俱無紀律田賦什而征一牧畜二十面征一歲得稅餉銀五百萬員領大部落二小部落五十

摩羅果東界阿爾尼阿南界沙漠西界海北界地中海須小部落二十有六產杏仁羊皮象牙密糖黃臘羊毛樹膠

緋司部東界阿爾尼阿西界摩羅果南界阿特臘斯山嶺小部落二十有四產大呢地氈綢紗手巾氈帽

阿爾尼阿國古時謂之盧彌尼阿縱七百里橫自五十里至百五十里戶二百萬口舊與摩羅果同俗可證古亦屬于

馬羅可國迨阿丹奪國悉改回教二百餘年全失本性蠻頑

無知土尚肥美宜播種山林栢椽叢茂而習俗游惰半

多荒棄以劫奪為生涯又為都會機所據設呢官以董

其事有鎮守兵萬五千隊伍皆無賴不知王法竟有絞

死呢官自擇同伍驍勇代之者土番之海寇亦自立一

王專劫海船所獲貲財半歸頭目半自裓分至千八百

十五年嘉慶二十一年始為彌利堅英吉利船擊敗旋有佛蘭

西船被其虜劫人貨俱盡佛蘭西於千八百三十年道光

年十越兵擣巢殲厥渠魁盡有全國設兵三萬防守其地

然腹地皆阿丹種類常懷仇恨故佛蘭西之官兵近已

退居港口不屯內地

阿爾尼阿東界都尼司南界沙漠西界摩羅果北界

海在都尼司之東北幅員二十四萬五千方里戶口

二百萬名領小部落五十有八產羊皮香料密臈羊

毛紗呢果實珊瑚

都尼司國職方外紀作弗沙國在阿爾尼阿之南東界特黎波里

南界沙漠西界阿爾尼北界地中海地勢平坦宜播種
且北隅沿海小島百餘較之阿爾尼阿疆域差小舊都
於加尼達近歐羅巴洲之南岸互市甚盛不亞大意大
里後為阿丹奪國駐兵加爾灣都尼司二部勒收回教
盡失舊俗榛狂無知道至千六百年明萬曆二十八年又為都
魯機所據設彌官以理政事兵卒橫行官受狹制民罹
荼毒近日會長遂背都魯機而自立改都于都尼司悉
除虐政與國人更始以土番頑蠢廣採才智凡歐羅巴
人稍有才識者雖微賤皆加任用立規條判曲直約束

番眾法度漸可觀幅員七萬五千方里戶二百萬口領
小部落二十有一產絨綢嗶嘰番覲

特黎波里國在摩羅果之南東界伊揖南界沙漠西界

都尼司亦古弗沙國境北界地中海域內多山惟北隅沃壤然

所產不贍於食仰資鄰國其人先受愚於阿丹之回教
嗣受虐於都魯機駐防之兵後有巴札曰哈彌者設謀
備宴邀其兵目三百會飲伏壯士禽縛誅之并盡屠其
兵黨即自立為王仍都於特黎波里都魯機衰弱不能
征討從茲不屬都魯機哈彌約束部卒除虐蘇困招徠

歐羅巴技藝之人教導土番近日之王寬厚儉節通好
各國外攬賓客內化愚頑較摩羅果等國政事尤整飭
領大部落二小部落三十有三幅員二十一萬五千方
里戶百萬口有奇

特黎波里東界伊揖南界菲山西界都尼司北界海
領小部落二十四產呢紗地種橄欖金沙象牙

菲山北界特黎波里東南西界沙漠在特黎波里之
南領小部落九

重輯原無今補

職方外紀曰阨入多近中海一帶為馬邏可國即摩羅果國

與弗沙國即都尼司國馬邏可地分七道出獸皮羊皮極珍

美蜜最多國人以蜜為糧其俗最以冠為重非貴人老
人不得加冠于首僅以尺布蔽頂而已弗沙地分七道

都城之大為利未亞之最宮室殿宇極其華整高大有
一殿周圍三里開三十門夜則燃燈九百盞國人亦畧

識理義阨入多之西為亞非利加地最肥饒易生一麥
嘗秀三百四十一穗西土稱為天下之倉馬邏可之南

有國名奴米弟亞即南阿未利加土番人性獐惡不可教誨有果

樹如棗可食其地有小利未亞乏水泉又千里無江河
行旅過者須備兼旬之水

南阿利未加洲各國

南阿利未加三面濱海一面界斯溜墨爾大山華語雪山也山自西而東與海岸齊長峯高千仞四時積雪南阿未里加諸山無出其右地分三國山之南曰兀賀峽今屬英吉利山之北曰磨舒阿那山之東曰加付臘厘河二者亦各有王土人有六種一英吉利一荷蘭一和鼎圖一磨舒阿那一加付臘厘河一摩耶斯滿六種中惟摩耶斯滿居於斯溜墨爾山谷中無頭目類野人其河皆發源斯溜墨爾山其南為岡都斯河南流由蘇加

部落出海東則額利霏矢河東南流由麻哈爾斯出海
北則阿蘭治河環繞山麓轉歷正西曠野而注之海其
加富臘厘阿之地尚有數河未詳源委

果羅里東界加富臘厘阿南西俱界海北界斯溜墨爾

山山斗出海中時有迴風舟行危險本名曰峽呵付丹

北司即華言暴風山也嗣西洋改其名曰峽兀賀言山

峽情景可觀

源案東方語先能後所西方語先所後能如飲酒曰酒飲登山曰山登故不曰兀賀

峽而曰峽兀賀也

峽長五百八十里廣二百餘里平蕪半沙石

無青草依山濱海夾岸茂林大田多稼峽達稔其首部

也

此亦當云達稔也峽西洋語倒耳

依峽建城始自荷蘭先得因里阿海

岸知此地堪為市埠於千六百五十年

順治七年

創築峽達

稔設官鎮守增戶授田商船輻輳始成樂土英吉利於

千七百九十五年

乾隆六年

率師爭奪荷蘭以兵拒退之

不數載英兵復至連戰竟奪峽地土人三種一英吉利

一荷蘭一和鼎圖英人多居峽達稔近闢地於額利非

駛河之左右歲被水潦舍田業商已成市鎮荷蘭人分

處四鄉田地寬闊爭界請丈啟訟行賄其官徇情偏斷

專嗜膏粱凡農事牧畜委諸和鼎突故爭訟不息東近

斯淄墨爾山兼練武事以防摩耶斯滿野番故此方荷蘭素稱趨勇和鼎突即果羅里之士番服役于荷蘭半奴半佃不辭力作人將死先攫其臟腑燎炙而食疾走善射能逐奔獸以硝皮織席造弓鑄刀為業喜歌舞不信教門領小部落七十九幅員十二萬方里戶十五萬口其首部曰峽達稔為歐羅巴人流寓之所背倚特步爾山高三百五十八丈其峽東西通衢產酒沉香牛羊獅豹之皮牛角象牙獨角獸牙

原本無部落

莫舒阿那國又名彌珠阿那東界加付騰里阿西界曠

野南界斯淄墨爾山北界馬路魯司在果羅里與斯淄墨爾山之北其首部曰古里查尼城即國都也宏麗甲於阿未里加洲風俗半農半牧技藝精巧廬舍內木外土彫刻彩飾外圍石垣為牧畜之所女司耕男司牧惟王及酋長之妻妾始免勞役服長衣飾以毛羽珊瑚珠寶厚待外國而與鄉鄰動輒爭鬥不死不休兼以劫掠為生故不敢散處惟聚居城郭與附郭之村莊也土人見王無貴賤之分席地坐談以烟為酬酢頭目臨陣以獸皮蔽兩臂手持籐牌及箭餘皆赤體交鋒俗佻達嗜

歌舞禦人以口給領小部落三十八產銅鐵皮

嘉富臘里在霏溜墨爾山之東南界果羅里北界尼臆
俄阿東界海西界莫舒阿那白海濱至此約二三百里
餘界里數未考土番有數種曰丹母幾曰蘇臘司曰和
倫頓氏司狀修偉膚紫色女番差卑小畧似歐羅巴惟
眼黑而光較有神俗無定處不耕種以游牧為業惟丹
母幾與鄰近果羅里一種尚能傾銀鎔鐵若蘇臘斯和
倫頓底斯兩種惟多膂力無他技也其王之札加常畜
壯兵萬五千倘遇警急則有少年兵十萬故為鄰國所

畏原本無部落

摩耶斯滿山番本和鼎突種類居於斯溜墨爾山谷有
如野獸不耕種專畋臘登山驀澗如飛見人即殺尤喜
歌舞星月之夜嘯躍達旦春秋佳日歌舞徹數晝夜

無部落

重輯原本無今補

新唐書曰自蕪林西南度嶺積二千里有國曰磨鄰曰
老勃薩其人黑而性悍地瘴癘無草木五穀飼馬以槁
魚人食鵲莽波斯棗也不耻蒸報于夷狄最盛號曰尋

其君臣七日一休不出納交易飲以窮夜

案利未亞各烏鬼國見史

者始於此

職方外紀曰更有一種在利未亞之南名馬拿莫大巴

者國土最多皆愚蠢

即山牙臘士蠻見阿邁司尼國志中

氣候甚熱沿海

皆沙人踐之即成瘡痍黑人坐卧其中晏然無恙也喜

食象肉亦食人市中有市人肉處皆生齧之故齒皆銼

銳若犬牙然奔走疾於馳馬裸身塗膏氣羶甚無文字

初歐邏巴人到此黑人見其誦經講書大相驚訝以為

書中有言語可傳達也地無兵刃惟以木為標鎗火炙

其末極銛利性不知憂慮若鳥獸然聞蕭管琴瑟諸樂

音便起舞不休性樸實耐久教之為善事亦即盡力為

之為人奴極忠用力視死如歸遇敵直前了無避畏其

俗不虜畧不崇魔像亦知天地有主但視其王若神靈

亦以為天地之主凡陰晴旱澇皆往祈之王若偶一噴

涕舉朝皆高聲應諾又舉國皆高聲應諾大可笑也喜

飲酒易醉所產雞亦皆黑獨豕肉味美為天下第一病

者食之亦無害產象極大一牙有重二百斤者又有獸

如猫名亞爾加里亞尾後有汗極香黑人穿於木籠中

汗沾于木乾之以刀削下便爲奇香烏木黃金最多地無寸鐵特貴重之布帛喜紅色班色及玻璃器又善浮水他國名爲海鬼其亞昆心域屬國有名諳哥得者夜食不晝食又止一食絕不再食以鹽鐵爲幣又一種人名步冬頗知學問重書籍善歌舞亦亞昆心域之類也利未亞之南有井巴番者衆十餘萬極勇猛善用兵無定居以馬及駱駝乘載遷徙所至卽食其人及鳥獸蟲蛇必生命盡絕乃轉他國爲南方諸小國之大害

海國聞見錄烏鬼國東北山與阿黎米亞相聯向西南

生出坤申方大洋何啻四五國之遠其盡處曰呷卽中國支山入海盡處曰表表者標也佛蘭西曰呷英機黎曰岌皆順毛烏鬼地是以紅毛甲板船從小西洋來中國者由亞齊之北麻喇甲之南穿海過柔佛出茶盤而至崑崙自呷而東至戈什塔自戈什塔而東至亞齊其海皆呼曰小西洋

案此以南洋爲小西洋與此書不合蓋利未亞洲烏鬼各國方爲小西洋

也人黑白不同皆西域裝束長衫大領小袖裹頭纏腰

國富庶產寶器生銀洋布丁香肉果水安息吧喇沙末油蘇合油等類以金爲幣鑽石爲寶

源案此所謂呷者指暹羅南境之新嘉坡而言計西南洋中新嘉坡為第一呷南印度戈什塔為第二呷利未亞之大浪峯為第三呷凡地之斗出海中甚長如登萊類者所謂呷也其實即峽之別字源又案騫馬爾罕者元時封藩統轄葱嶺以西各國至明中葉賽馬爾罕已分十餘國不盡為所屬矣近日更全變為回國若敖罕若布哈爾若愛烏罕若巴達克山若克什米爾等凡十餘國而聞見錄猶以古時賽馬爾罕統稱之誤矣至又以賽馬爾罕為噶爾且之國則誤中又誤矣謂俄羅斯國惟限于西洋而其與中國相首尾之東北萬里概置不提皆疏舛之尤者書作于雍正刊于乾隆八年在新疆未服以前故傳聞遙揣舉一漏百故刪節而辯正之于此

海錄妙里士島西南海中島嶼也周圍數百里為佛郎機所轄凡大西洋各國船回祖家必南行經葛刺巴至

地問然後轉西少北行約一月可到此山無土人其所居皆佛郎機及所用烏鬼奴土產烏木由此向北少西行約半月有奇謂之過峽一路風日晦暝波濤洶怒寒雪飄零六月不息舟人戰慄咸有戒心其天氣與妙哩士迥別過峽後至一島謂之峽山為荷蘭所轄天復炎熱但海闊風狂波浪騰湧舟行經此遇風過猛必須稍待風和而行山亦無土人唯荷蘭及鬼奴居之土產梨及牛黃有大鳥莫知其名其卵大數寸由此更北行少西順風約七八日復至一島名散爹里周圍約百里為

英吉利來往泊船取水之地無土產有英吉利兵在此

鎮守

源案此峽即坤輿圖之大浪山在利未亞洲極南境

又曰鬻毛烏鬼國在妙里士正西由妙里士西行約一月可至疆域不知所極大小百有餘國民人蠢愚色黑如漆髮皆鬻生其麻沙密紀國生那國咖補五輦國皆為蒲萄亞所奪又嘗掠其民販賣各國為奴婢其土產五穀象牙犀角海馬牙橙西瓜

海島逸志曰鴿島在西北之隅和蘭甲板船數十隻歲通往其祖家必由此地停泊更換舟工水手裝下伙食

然後再駛蓋其地當半途之間華人在巴有受其傭顧為舟人者至此地必更和蘭人華人暫處於此配船而還巴不令往其祖家然甲板船來往相傳來三去五其來風水為順只有三月往則水逆道紆當須五月又云將至之處有暗海不見日月舟行二三日始出蓋天地之大有不可思議者矣

即所謂大浪峯也為小西洋利未亞極南之峽凡船回大西洋

者過此

日過峽

海國圖志卷二十二

西阿利未加洲各國目錄

嘉約國

莽孟國

雅爾蘭國

大達多臘國

火洼爾國

馬臘國

孟倫薩國

耶尼國

稔里國

西臘氏國

以上十國同區皆在色黎安彌河之北

霏落司國

夫達雅羅國

額林國

埃阿里國

阿寒氏國

那和彌國

米領國

哇里國

尼門國

根我國

鑿峩國

雅門國

菴峩臘國

敏維臘國

以上十四國皆在色黎安彌河之南皆西瀕海

海國圖志卷二十二

歐羅巴人原撰

侯官林則徐譯

邵陽魏源重輯

小西洋

西利未
亞洲

西阿利未加洲各國

西阿利未加分兩大區其一區起自色黎雅爾河以南
至安彌阿河以北內有九國一嘉約二莽孟三雅爾蘭
四夫達多臘五和洼爾六麻臘七母沙倫八雅尼九稔
里大小各國同屬一區佛蘭西人遂合并兩河之名以

名其地曰色黎安彌阿九國之中僅加約濱海餘俱腹
內又有西臘氏國相毘連在色黎雅爾河之北其安彌
阿河以南至敏維臘河又有十四國同區一霏落司二
夫達雅羅三額林四洼里五彌領六尼門七埃阿里八
阿寒氏九那和彌十根峩十一安騰峩十二鑿峩十三
雅門十四敏維臘皆濱海之區地勢平蕪偶有高阜亦
皆錯出海中名山巨嶽盡在腹內橫數百里袤長約四
千里彎環參錯凡二十四國山以公山爲最巨由色黎
安彌阿至東阿未里加之悶山蜿蜒相連城內河道皆

發源於此山之西有菴彌阿河色色黎雅爾河尼額河
山之南有來阿額蘭尼河米蕪那河其源遠而濶者尼
額河由花羅來市直達阿蘭底海安彌河河流最駛由
色黎安彌阿南入海色黎雅爾河源較遠曲折潑洞由
色黎安彌阿北入海若來阿額蘭尼河彌蘇臘那河俱
在南隅由根峩諸口入海尙有色爾戈河安薩河未悉
其源委其海口距內地里數不等歐羅巴人分疆畫域
域惟以河流分界然亦止知瀕海莫窺內地卽阿丹地
理所載亦多臆度始耶穌紀歲千四百三十年

明宣德
五年

有葡萄亞人舟過麻牙那山麓暫棲于阿爾厘島始訪
出北隅之色黎安彌阿繼尋得南隅之根峩等處從茲
沿海埠頭悉屬葡萄亞千六百四十餘年葡萄亞浸衰
其俄爾戈之地卽爲荷蘭所奪雖旋收回而色黎安彌
阿又爲英吉利佛蘭西所據英人卽在巷彌阿河口立
埠佛蘭西則在色黎雅爾河口立埠兩國皆有公司各
立炮臺出口貨物惟金及人口最大至內地情形英吉
利與佛蘭西人講求探溯尙無端倪而兩國構兵遂爲
中止聞其人戶共二千百餘萬口大都厚唇扁鼻邪面

後仰色黑髮鬖不裝飾無技藝文學戰鬥雖悍平居尙
淳樸不習教門專祀匪底祇之神或以大樹大石或以
象牙狗牙虎牙羊頭魚骨或樹枝繩束等類隨意而指
卽以爲匪底祇之神有供奉在家者有位置在村莊者
立龕列祭遇事祈禱人死多焚財帛謂資冥用宰人作
牲以享先靈嗜音樂喜歌舞多畜妻妾常人多則一二
十王則動百十計而阿寒底那和彌兩國酋長竟至數
千民居卑小門高三尺鞠躬而入一妾一門外圍以墻
上下皆然惟宮室廨署略較爽塏間施采飾以別等級

男女皆喜帶手鐲指環或金或象以多爲美卽赤貧亦繫鐵鐲面繪紅白文身刺膚以手搏食飲啖乘數人產橡樟楊柳葡萄酒桂皮無花果甘蔗桑椹薯蒜栗油淨石椰子松柏樹龍血樹檸檬柑桃李蕉菓西瓜黃瓜米粟棉花糖蓆材木金銅鋼鐵象牙計象牙歲值銀約十五萬員

色黎安彌阿十國

色黎安彌阿一區內有九國在西阿未里加之北東界蘇厘麻西界海南抵安彌阿河北抵色黎雅爾河東西

距七百餘里南北距二百五十里大小九國又土番三種一曰野羅甫一曰付臘司一曰舅領俄付臘司種類高大扁鼻唇厚面似橄欖俗奉馬哈墨回教性向平和周濟老弱疾病與外來窮旅無定處游牧爲生隨帳遷徙舅俄領種類面黑業漁喜問訊嗜歌舞多娶妻妾妻有過撻之於市以示懲警野羅付種類面黑業紡織善騎射計數以五作十無文字

嘉約國卽野羅甫在色黎雅爾河口瀕海岸爲色黎安彌阿區中之大國惟一部落曰麻昔卽酋長所居佛蘭

西人貿易其地遂據河口築炮臺又於對岸之俄黎島設立部落居人三千爲河口之保障樹木叢茂產豐多商賈

莽孟國在色黎安彌阿之東附近色黎雅爾河內有那達更山金鐵相間掘至數尺許卽有金粒至丈許則金粒成團土番不善支撐礦穴動致坍塌色買臘山金在剛石之間鑿採費工又有半山出產紅石

雅爾蘭國在色黎雅爾河之上流地處極東與滿母比鄰佛蘭西船曾商其地獲利倍蓰以水土不服河道難

行世被劫掠遂不復深入其地

夫達多臘國在色黎雅爾河之下流距海不遠河之南北均其轄地會長回教種類亦不能制其部下

和瓦爾國近海蕞爾之區會長蠻野無匹自稱曰額利墨臘猶華言王中王云

馬臘國在安彌阿之北距海甚近會長所居卽馬臘部落也境內有尼利弗里市埠設有稅館先屬葡萄亞國英吉利奪之而于安彌河河口築砲臺防守溯流而上四十里卽比沙部落英人雖有貿易究不與內地尼額

河相通故交易不盛

孟薩倫國在馬臘國之上幅員較闊土番約三十萬均
勇領峩種類

雅尼國稔里國均小國也居于孟薩倫之上厥土墳衍
產穀甲一方再行四百里卽沙水并湧之地多鱷魚水
鳧岸則野獸成羣舟楫難駛

西臘國在色黎雅爾河之北與前九國昆連爲十河
源發自公山至馬臘之尼力弗里出口經西臘氏境內
者居半

安彌河以南至敏維臘河以北十四國

霏落司國在嘉約之南東界蘇里麻西界海南界夫達
雅羅北界嘉約之安彌阿河土厚產豐雜鴨蜂蜜尤蕃
庶歐羅巴人至此貿易向例須勇領莪從中經紀兩家
買賣不得見面故不能徑與通商

夫達雅羅國又名富臘司在霏落司之東少南東界額
林西南界海北界蕪厘麻幅員約長三百五十里寬二
百里一鼎磨一黎彌里阿一西耶臘厘阿那一騰達俄
司四大部落也酋長居於鼎磨常領千六百人虜掠人

口賣與歐羅巴人爲奴祭祀用人爲牲土番皆付臘司
種類俗奉馬賀墨頓教西耶臘厘阿那濱臨海岸爲英
商市埠由此至額林邊界約程二百臘彌里阿在彌斯
臘那河口爲彌利堅市埠南北長二百五十里寬二三
十里土沃民隋多無賴產銀鐵材木皮細布棉花糖油
象牙蘇木黃蠟胡椒

額林國在夫達雅羅國東南東界埃阿里南界海西界
夫達雅羅北界蘇厘麻惟一部落曰鼎來酋長居之祭
祀亦用人爲牲并有夫死而妻自殺墓前以祭者別有

一種教師曰墨爾里能專國中之權其教師少年離俗
露處深林修鍊日久能作怪異能通奧妙非但識其教
中之理并能審識案牘方可謂之墨爾里其地舊屬屬
葡萄亞今土有葡萄亞之人與土番雜處土產胡椒

埃阿里國在額林國之東南界海北界梭難東界阿寒
氏西界額林領部落二一曰臘后濱海口一曰耶格蘇
居腹內臘后所產象牙爲最歐羅巴人以土番獷惡罕
往貿易土番言語聲在喉中若野獸叫嘯駭人聞聽

阿寒氏又名我戈爾在埃阿里之東少南東界那和彌

西界埃阿里南界海北界蘇蘭幅員萬四千方里戶百萬口并奴僕之數則有四百萬領部落四一吉戈司一依爾彌那濱臨海邊一阿加騰一準鼻里均在腹地吉戈司英吉利商賈所寓有炮臺東行約五十里即依爾彌那爲荷蘭市埠炮臺甚多海岸土疏多沙而沃產糖與包粟最豐產金礦土番暴躁好訟房屋閎整每村設一會議之所以高年掌之審理訟獄富家多以訟敗產屠人祭奠酣宴數日習俗男逸女勞負重工作無非女惟捕魚則男耳服色向白酋長以下多繫金錫兵事或

戰或和悉商之四官春秋二祭皆屠人祈福酋長身死輒戮千人以祭先拘外國奴僕並羈禁之罪囚不足則虜行人故入市不敢獨行恐被虜也妻妾以多爲貴酋長例有三千並選姿色稍忤意輒戮死並鬻人口與歐羅巴人爲奴其暴虐甲通洲然酋長亦知慕歐羅巴之材藝以教其人民陳設器物皆精巧其出口之貨惟有黃金屬地甚廣如領幾臘阿幾浣注掃阿廣磨四國皆其所轄後又征服內地之雅漫陰達那安麻諸國那和彌國在阿寒氏之東少南東界彌領西界阿寒氏

南界海北界梭蘭附近海岸長廣各二百里其沿海之地曰斯列哥士華語奴僕岸也本恢那國之地其酋長恃富驕淫遂爲那和彌所併風俗人情與阿寒氏同而殘忍更甚人死不殮不埋掛于墻壁任其腐朽宮室廟宇覆以人之天靈骨酋長妻妾例有三千每年傳集番女挑選一次上等自留次者指配番官鄰近尙有阿那臘那厄里臘俄司諸屬國臘俄司斯甫將少婦倒植神前有犯死罪者纒首樹杪阿臘那土產棉花油番靛瓦器鐵器

彌領國又名彌阿佛臘在那和彌之南少東濱海廣約二百里與洼里尼門二國同區彌領地勢低窪恒患潦溺產象牙俗敬匪底祇神國人見酋長當如見神設有干犯酋長者已科犯上本罪再加褻瀆神明規條施以極刑

洼里國在彌領西南濱臨內河地勢卑濕溪汊紛岐皆狹不容舟惟墨臘斯河較闊源流亦長直達阿蘭底海土瘠民稀風俗略同彌領

尼門國在彌領東南沿河逆流而進約行六十里卽耶

付連部落酋長蠻野戰勝即聚其顛骨以造廟宇以祀
匪底祇之神販鬻人口每年約二萬產象牙最多其次
油鹽

根峩國在蠻峩之南少東北界蠻峩西界阿蘭底海南
抵安臘峩東界曠野領小部落三根俄注在內地酋長
所居也馬領麻加敏那均濱海涯土番身體短小面黑
有力俗惰罕耕種樹皮為廬草蓆蔽體地曠人稀村小
者百餘人大者數百人分四等曰頭目曰錢糧戶曰
耕戶曰家奴酋長與頭目多蓄妻妾販人口市埠雖在

海岸而所販之人悉由內地運載而至
蠻峩國在根峩之北西抵阿蘭底海南抵根俄東北俱
界牙門風土人情畧同根俄
安莪臘國在根俄之南東界曠野西界阿蘭底海南界
敏維臘北界根俄風土人情亦同諸部
敏維臘國在根俄之南西界阿蘭底海東南俱界荒蕪
之地北界根俄沿海岸數百里俱葡萄亞所轄每年販
人口約二萬計風俗同前諸部產上銅

重輯 原無
今補

利未亞之西濱海有西爾得國其地有兩大沙其一在海中隨水游移不定其一在地隨風飄泊所至積如邱山城廓田畝皆被壓沒國人甚苦之又有工鄂國地亦豐饒頗解義理自與西客往來多奉真教其王又遣子往歐羅巴習學文字講明格物窮理之學焉

四洲志中西利未亞

各國頗詳未審此二地屬何國

又曰亞非利加海邊向有匪徒駕船載火藥烏鎗各項美酒以及玩物賣與黑面奴因此販賣人口又有列國貪利之夷目侵伐鄰境虜掠生俘若羣畜然赴海口販

賣將奴三四百口擁擠下鎗縲繲桎梏悶不通風臭氣染病死者不勝其數英吉利公會立法定例嚴禁販賣人口罪同海賊巡船常駛來駛去到處搜探一遇載奴船隻即捕送治以死罪上年十月兵船巡海遇有販奴用泊於海隅忽先放砲招降既不肯投遂衝鋒掩殺一人戰死六人受傷畢竟奪獲其船赴葡萄亞埠頭其城之鎮守官強索其販奴船英軍不允葡萄牙放砲轟擊英之水師憤怒返棹啟咨本國將帥已領戰船赴彼雪怨

海國圖志卷二十三

中阿利未加洲各國目錄

莫盧農國

曼那臘國

羅良國

敏雅彌國

蕪名地

葛司沙國

沙加都國

峩墨山付臘國

嘉諾國

嘉司那國

色塞國

嘉達國

蒿司沙西國

裕里國

洼瓦國

莫爾峩國

莫司沙國

巖阿國

泥霏國

以上十九國皆與西洋通市之地又附泥霏國五小部

丁麻杜國

麻西那國

展里國

莽馬臘國

加阿臘國

嘉孫國

沙達盧國至富臘慮五小國
以上六大部五小部皆
尼厄河上游之國未與

西洋
通市

海國圖志卷二十三

小西洋 中利未
亞洲

歐陽巴人原撰
侯官林則徐譯

邵陽魏源重輯

中阿利未加洲各國
職方外紀言亞昆心域國地
極大居本洲三分之一則中

阿利未加亦在其內
不止阿邁司尼也

中阿利未加洲地處中央環以羣山沃野平曠灌溉不
竭為全洲膏腴之最西界西阿未里加北界曠野東界
查湖南界無考長三千餘里廣千有餘里山最大者曰

海國圖志卷之二十三 西洋
閩山自東至西起伏綿亘與洲境同其起迄中阿未利
加僅山之中央一隅耳峯巒層疊崖石嵯峨有似倒塌
炮臺者有似銳浮圖者形勢不一高者二三千丈崎嶇
與平坦相間山內可種棉粟并有城垣依山而建天炎
土燥而田疇不乏水澤皆資閩山之灌溉河道有四曰
尼阨河曰孤盧尼河曰菰彌河曰瓜臘馬河皆發源閩
山而尼阨河最鉅源遠流長計三千餘里總受諸河之
水由機里出海諸國皆沿河建立湖以查湖爲最濶與
磨爾農連界長約六百里寬約四百里其水澄清甲天

下湖中小島各有居人林深草茂飛走藪澤次爲尼彌
湖雖不及查湖之大亦一目難窮此外皆小湖而已幅
員遼闊內多小國距海岸遠不與海國通往來近四十
年始有冒險至其地畧悉情形究無史書難溯源委讀
阿丹地理誌載千二百年宋承安五年部內之人遷徙曠野

之南可見居於中阿未里加洲者多阿丹之人并聞先
日有阿麻西尼司與翁彌阿尼司互爭勝者各自立國
其最大曰嘉諾曰薩加曰磨爾農嘉諾之南產金最旺
千四百年明建文四年摩羅果大頭目阿佛厘加盧士統衆

至丁麻杜奪得依機阿各地立國稱王即名丁麻杜國

嘉時嘉諾亦屬丁麻杜所轄矣千七百年康熙二十九年間又

歸於加斯那千八百初年嘉慶五年薩加觀頭目曰蘭華利

荷者自立為王并服蒿司沙部磨爾農部遂成大國不

久分裂為摩爾農頭目所驅逐蒿司沙各部落若俄墨

若色塞同時亦各自王即如丁麻杜國自阿佛厘加盧

士以後即為摩羅果之屬國滿馬臘向稱大國所屬之

展里大部落近已為頭目阿馬盧所據各國政事皆自

專制故無著名之邦亦無統轄之主蝸角蠻觸各長一

方其俗百官見王匍伏殿前以首叩地各國王死屠人

以祭雖不若西阿未里加阿寒氏那和彌二國之多然

祀典用人亦不能缺王之所貴不在宮室制度而在妻

妾貨財故國王宮室僅加於民居一等往往苦蓋塵積

乳燕環飛兒童裸露樸陋無倫而妻妾之多則難以數

計凡監守各宮以至服役皆姬妾焉部落長官皆由民

自推擇賦稅無定額軍旅無紀律惟摩爾農之兵似有

隊伍善長鎗籐牌行列方圓成陣臨戰僅裹獸皮以禦

弓矢薩斯親國有兵六萬各國皆不習火銃惟阿丹密

商有火器遇兩國爭鬥常以此解圍土產粟米棉花洋
靛六畜獅象豹蜂蜜象牙金沙洋藍布各埠運貨并無
車輛全藉負載賈於斯者皆阿丹之人由北阿未里加
越歷沙漠缺水草多盜賊近日始知雇駱駝馱載節省
倍蓰所運入者如絲紬呢紙珠銀器利皆數倍運出則
黃金象牙奴僕居多奴僕多自南山虜掠而來非但賊
盜卽國王貴官亦然如莫爾農之王與曼那臘王之女
爲婚曾會赴麻斯俄虜掠人口三千以賀嘉禮境無溝
洫亦少衢道荒陬曠野信足穿越或倒木橫阻或雨水

泛濫行旅躑躅馬瘖僕吁土番與阿丹之人雜處僅學
其技藝工作從不習其回教文字地素蠻野較之通洲
則尙知禮義喜結交惟俗向掠奪在他方尙以貧劫富
此則以富劫貧習不爲耻凡事皆信匪底祇之神其摩
爾農蒿司沙兩國極欲修文苦無教導性喜歌舞雖尊
貴亦登場演唱揚揚自得土番面皆黑卽所謂烏鬼國
云

莫爾農爲中阿未里加洲强大之國幅員七萬五千五
方里戶二百萬口在查湖之西濱湖水鄉美稼穡多獅

海國圖志卷三十三小西洋
象熊虎爲害領大部落八鈎加其首部落也其次若安
俄那若安牙臘若吾尼若加領若臘里若加沙里若阿
爾磨盧農七部湖山錯壤大小各別而富庶以安俄那
爲最始王其地者本阿丹之人嗣有依爾加尼者起兵
據國放前王于附郭逐官民回阿丹其國中大官以皤
腹爲美首纏白布其王接見歐羅巴人則端坐龕中外
列待從陳兵護衛性好鬥而不輕捷敗則走步艱難坐
以待斃土番黑面厚唇樸魯好鬥善紡織精染洋籃耕
種昔以女國王所駐鈎加部落甚小居民萬人安俄那

爲國中最大之部居民三萬貿易集會約有十萬安牙
臘吾尼亦兩大部北則加領部與曠野交界居民驍勇
臘里部民僅二千加沙力亦大部居民善用藥箭阿爾
磨盧農部落近已荒廢

曼那臘國在磨盧農之南山谷土沃領大部落八以磨
臘爲首區悶山最高之峯在其境內陟巔遠眺疆域了
然土番不習教門文身衣革麻斯俄部落最爲蠻野好
騎生馬衣山羊豹皮取讐人牙齒串珠掛頸以夸其羣
那古爾臘地處山谷村堡堅固好武鬥勝善用藥矢摩

爾農兵侵之爲所敗

羅良國在查湖之南爲洲中最靈巧之國接壤強鄰皆兇惡好殺竟能立國保境安民皆才智所致也即以羅良爲首部落街衢坦濶距查湖僅四十里產佳木香草精染洋藍布不亞於摩爾農錢用鐵鑄形如馬蹄番婦容貌在黑人中爲最端好卑濕多汶惟日午暫息餘時皆蟲飛薨薨

敏雅彌國在查湖之東南土域遼闊土番勇戰衣鐵甲習長鎗視摩爾農器械尤備交鋒亦無紀律

蕪名地在查湖之中島嶼甚多居於斯者皆彌落麻之人島旁泊船千計無非盜艇土謠云天未貽我糧神未貺我牛與羊只生膂力與詐腸我居宛在水中央不刦何以豪四方磨爾農王欲禁之無如何也然所虜人口以作奴僕尙不甚殘虐往往給以妻室

蒿司沙在尼阨河之西幅員遼闊界域莫詳壤燥宜麥一歲再獲倉廩充實果蔬旣多且旨土番皆阿丹之人

自耶蘇千年以後

宋咸平三年

陸續遷至非其回教中人無

不被虜爲奴與西隅之黑番貿易

沙加都國即多谷魯在蒿司沙之西土沃民庶先居薩加都近遷馬雅利阿城池壯闊甲於中洲墻高三丈門戶十二日落即閉王宮前面方角開敞四壁藻繪薩加都之舊部落近已頽毀

俄墨國山付臘國均蠻地好鬥俄墨首部曰古尼阿城池堅固於千八百二十九年道光二年蒿司沙率兵六萬侵之為俄墨所敗山付臘首部曰沙彌當加諾薩加都兩部之衝專劫行旅為業

雅那國即嘉諾為阿未里加腹內之地疆域雖狹於舊

而商賈市埠猶甲諸國加諾首部落也周十有五里居民約三四萬中央地窪而曠水涸之後貿易聚焉為一大市鎮有頭目司市價辨真偽設有賤售貴贖亂真者則經紀受罰日出登市日入即散又有奴婢市兩棚分列男女各坐一棚買者先觀五官四肢繼令其步履聽其音語市用小介壳為錢謂之勾力士四百八十枚值銀一錢八分

嘉司那國在加諾之北向稱大國前時之蒿司沙曾屬其管轄城墉廣闊民居不及十之一皆商賈所集

色塞國在加諾薩加都一國之南爲中洲最沃之壤產上米蜜棗沙厘阿其首部也居民五萬田疇繡錯林麓葱蔚色塞之南亦饒水草尙有小部落屬其統轄

加達國居衆山之中村莊大小五百領羅臘其首部也地雖多山而濱沙力河土亦膏澤貿易頗盛惟土番蠻惡前遇歲歉盡屠外國商賈而食之由領羅臘沿河而東卽阿那磨洼皆加達屬地也

蒿司沙之西國轄部落四首卽加雅東部次卽山尼阿部次加達良部次珊山部加雅東美田疇山尼阿在山谷之中形勢環拱頗秀蔚加達良曾屬莫盧農之部落珊山貿易一大市鎮也人皆獷狠

裕里國疆域平曠近尼阨河常有水患厥土潤澤最宜播種俗勤力作土番雖多爲奴然伶俐耐勞首部卽裕厘甚寬濶植木城而裹以鐵周三十里居民蕃盛強勇阿丹人常侵之皆被驅逐王宮儉陋國王曾殺有名游士曰巴客大受惡名後遂優禮格臘白頓遊人以改前過

注瓦國葦爾地耳而田疇膏沃地常孔道都邑居民不

及二萬而蒿司沙之商賈蒼焉市陳百貨曲巷連甍管絃宵晝行人至止殺醴錯陳

磨爾俄在磨斯沙洼瓦兩部之西北半多叢山茂林幾阿麻其首部也王奉回回教敬匪底祇神宮殿設兵扈衛宮室帷帳陳設侈靡土番驕勇敢鬥盜賊尤多劫奪四出

莫司沙國在裕里國之下首部落即名莫司沙濱臨尼阨河河岸寬闊下即大石灘舟楫往來素稱危險地宜五穀前爲阿丹人所據後始殺逐阿丹自立爲國前時

遊人巴客被害卽在此灘

巖阿國美田疇多農商西方富庶之區也轄大部落五曰巖阿曰磨府曰匱那曰幾司曰查吉仙原都磨府近遷居巖阿城周十有五里民戶未詳其數磨府今雖不復爲都而居民安之尙稱樂土匱那在國南幾司在國北若查機則山谷之中王宮及民舍墻皆苦覆惟門楣多有雕飾頭目見王曲踞盡禮王多妃妾雖以數計宮內之事皆媵妾司之凡祀神亦以人爲牲特不至阿寒氏那和彌之多耳國中間有小山至高者三百丈天氣

和暖高下皆可布種產粟米棉花尤工機織其布與尼
霏國等林木馨香蜂蝶翩遠花晨月夕致堪游衍

泥霏國在尼阨河之東岸亦富庶之區居此土者半回
回半黑人泥霏之黑人又黑人中之靈敏者奴僕皆工
織機故所織棉花他國莫及轄部落八那麻其首部也
產五穀牛馬草蓆之佳甲於通洲菰爾府部落在其北
界城池堅固貿易蕃盛部民盡回教男女無別臘牙馬
及馬尼磨兩大部落均依尼阨河之東岸因阿丹侵擾
改遷西岸巴達司在莫司沙之邊界沙俄司與臘麻相

距不遠四水環繞洲浮水面工作精巧所織棉布通洲
頭目無不購而珍之有七百軍船防守邊界伊牙部亦

臨河岸長四里多商舶

以上十九國皆
與西洋通市

以下附五部落均自爲會長

嘉公那部僅有大村鄉三自立頭目雖不屬泥霏
國而土番頗馴

封那部距嘉公那四十里一大市鎮也再行四十
里尙有數部落情形莫詳

磨卦部亦在嘉公那之下相距約八十里大市鎮

也商賈鱗萃有頭目經理其事

機里部在磨卦之下相距約五十里多商船亦一
大市鎮然土瘠歉收其草牲畜不食故居民皆漁
蕉菓河以糊口產油最著

伊磨部在機里之下相距約七十里城池寬大濱
河口亦市埠也出口貨物油與人口居多往來船
舫陳設器具頗似歐羅巴夾岸多大宅栽種芭蕉
椰子臙榭華麗勝於鄰國惟俗習驕恣無度酗酒
輒達宵旦

以上中阿未里加腹地諸部也尙有尼阨河上流
各國地土肥美畧同遊人巴客道死不及回國莫
詳其所經歷而各大部落亦畧有所聞附載于後

丁麻杜國在中阿未里加洲邊界產黃金光色射目歐
羅巴人常冒險至其地部落遼闊情形莫悉方其盛日
蒿司沙各國均屬統轄近數百年并己國反屬於摩羅
果矣近日黑人爲王宮室民舍半皆圓銳形若蜂房厥
壤燥瘠產不敷食仰給鄰國由尼阨河沿流運至加墨
臘津口一日可至以金礦甚旺故商旅若鶩多摩羅果

阿爾尼阿都尼司三都之人百貨充牣惟黃金奴僕兩種交易最大

麻西那國在彌尼湖之旁宜牧畜距丁麻杜部落頗遠土番付騰司種類酋長卽展里酋之弟

展里國濱臨尼阨河邊首部卽名展里酋長阿丹人居民萬口貿易稍遜丁麻杜而丁麻杜所需貨物多購諸此商賈皆富臘司曼領俄莫馬臘摩羅四種間有黑番至此貿易

莽馬臘國土曠而沃色俄其首部也尼阨河居中宮室民舍依傍兩岸墾鱗比街衢方軌居民三萬南山所產金沙皆運此出售珊山領部落貿易亦盛居民萬口麻臘母部落產鹽北界曠野爲摩羅人牧場

加阿達國皆沙土首部落曰甘猛

加孫國地小而沃首部落曰孤尼阿加里

沙達盧根戈盧領尼古墨魯古富臘盧五小國高阜多林木河中產金沙甘干亦落其大市鎮也每遇禮拜三墟期焉母里地多金運此銷售產蜜糖棉花火器火藥花布及歐羅巴貨物無一不備

以上六大部五小部皆尼阨河上游之國未與

西洋
通市

文列蘇巴倫等處...

...

...

...

...

...

...

...

...

...

...

...

...

...

...

...

...

...

...

...



